

Newspaper	Berita Harian
Date	31/1/2013

© KHAMIS 31 JANUARI 2013

FF

BH

PELAN PEMBANGUNAN PENDIDIKAN 2013-2025

# Kabinet lulus laporan akhir

BH - 31/1/2013

» Kerajaan akan persembahkan kepada Majlis Raja-Raja

■ Petaling Jaya

**K**abinet semalam menerima dan meluluskan Laporan Akhir Pelan Pembangunan Pendidikan 2013-2025, kata Timbalan Perdana Menteri, Tan Sri Muhyiddin Yassin.

Muhyiddin, yang juga Menteri Pelajaran, berkata laporan itu seterusnya akan dipersembahkan kepada Majlis Raja-Raja Melayu dalam masa terdekat.

Beliau mengumumkan demikian pada majlis jamuan malam sempena ulang tahun ke-21 dan kempen rayuan derma tabung pembinaan bangunan Huazong, di sini.

Turut hadir Menteri di Jabatan Perdana Menteri, Tan Sri Dr Koh Tsu Koon; Presiden MCA, Datuk Seri Dr Chua Soi Lek; Presiden Huazong, Tan Sri Pheng Yin Huah; Duta Besar China ke Malaysia, Datuk Chai Xi dan pengasas Sunway Group yang juga wakil penangung bangunan Huazong, Tan Sri Dr Jeffrey Chuah.

## 11 anjakan

Pada September tahun lalu, Perdana Menteri, Datuk Seri Najib Razak melancarkan Laporan Awal Pelan Pembangunan Pendidikan Malaysia 2013-2025 yang menggariskan 11 anjakan strategik dan operasi untuk mengubah sistem pendidikan negara.

Antara yang digariskan adalah menyediakan akses sama rata untuk pendidikan



Muhyiddin (tengah) menggaul 'Yee Sang' pada majlis makan malam ulang tahun ke-21 dan sumbangan untuk tabung bangunan Huazong di Kuala Lumpur, malam tadi. Turut bersama, Chuah (enam dari kanan), Yin Huah (enam dari kiri) dan Soi Lek (lima dari kanan). (FOTO BERNAMA)

berkualiti dengan standard antarabangsa, memastikan setiap pelajar fasih dalam bahasa Malaysia dan Inggeris, membangunkan rakyat Malaysia yang dipacu nilai murni dan menjadikan perguruan sebagai profesion pilihan.

Dalam pada itu, Muhyiddin berkata dakwaan sesetengah pihak bahawa kerajaan meringirkan sekolah aliran Cina adalah tidak benar sama sekali.

"Perdana Menteri dalam Belanjawan 2012 mengumumkan peruntukan sebanyak RM100 juta khusus membiayai pembangunan dan penyelenggaraan Sekolah Jenis Kebangsaan Cina dan ia diteruskan dalam Belanjawan 2013," katanya.

“**Perdana Menteri dalam Belanjawan 2012 mengumumkan peruntukan sebanyak RM100 juta khusus membiayai pembangunan dan penyelenggaraan Sekolah Jenis Kebangsaan Cina**”

Muhyiddin Yassin,  
Timbalan Perdana Menteri

## Kekalkan keharmonian

Sementara itu, Muhyiddin berkata, pertubuhan yang mewakili kaum tertentu mempunyai peranan penting dalam mengekalkan keharmonian masyarakat berbilang kaum di negara ini.

Beliau berkata pertubuhan seperti itu kerap kali menyuarakan hasrat sesuatu kaum dan mengemukakan cadangan untuk dipertimbangkan kerajaan.

"Namun hari ini ada pihak tertentu yang lebih cenderung melakukan provokasi, termasuk dengan melakukan demonstrasi, bantahan atau rapat umum untuk menuntut hak sesuatu kaum atau agama," katanya.

BERNAMA